

DISCURSO DI PREMIER EMAN RIBA DIA DI BETICO

Su Excelencia Gobernador di Aruba y su distinguida esposa, Sra. Presidente di Parlamento y su distinguido esposo, Miembronan di Parlamento, Colega Ministernan, Famia di Betico, Conciudadananan.

Un dia nacional manera awe ta duna nos e oportunidad di para un rato y pensa riba e forma cu nos ta maneha nos pais. Conmemorando un di e lidernan di mas grandi cu nos isla y Pueblo a conoce, nos ta purba contesta e pregunta, con nos Aruba lo tabata awe, si E tabata na bida? Con E lo a solucionera e retor cu nos ta confrontando awe?

Pa nos por haña contesta riba e preguntanan aki, nos ta busca den historia di nos pais y den historia di Betico. Y nos ta mira e ora cu nos ta haña hopi situacionnan y momentonan cu ta sirbi como ehempel pa nos, den

nos trabao diario. Pa gobernacion di nos pais y pa tumamento di decision riba hopi tereno awe cu ta exigi nos atencion, nos ta haña den bida di Betico y su trabaonan, ehempelnan cla cu sigur ta sirbi como guia pa nos tur.

Recientemente mi a referi na e forma cu nos ta hibando politica na Aruba, como uno cu e peligro di haci daño na nos mes sin ningun sentido. E manera cu nos ta atende cu otro a causa cu no solamente aki cu nos tabata tin sentimentonan cu no ta esnan cu E lo a desea pa nos tin na e momentonan aki. Y muy en particular den exterior nos a experiencia situacionnan doloroso pa nos Pueblo. Pa sali for di e situacionnan ey, nos cu ta dirigiendonos pais awe mester mira na esnan cu a encarga nos cune den pasado. Y pa sali for di e situacionnan dificil nos a haci un apelacion

riba tur aki na Aruba cu ta carga responsabilidad, pa nos tuma ehempelnan constructivo pa nos hiba e lucha pa nos pais; pa nos restaura nos bon nomber cu semper nos tabata tin aki na Aruba y den exterior. Awe nos ta sintiendo e forzanan positivo, e forzanan constructivo cu ta uniendo atrobe pa pone e nomber di Aruba na halto caminda e mester ta.

Y esey ta e momentonan cu nos mester bira bek, y pensa con ta posibel cu tin biaha e influencia positivo cu mester tref, mas cu nunca den momentonan dificil y mas cu nunca cerca esnan cu mas lo mester ta cargando e, nos ta haña falta di dje. Nos ta spera cu un dia nacional manera awe, cu nos ta recorda e bida largo di un lider grandi, cu esaki ta un estimulo pa tur esnan cu mester carga responsabilidad importante pa nos pais.

El a laga hopi atras pa nos siña di dje. Pa crece, pa nos eleva na un nivel cu E tabata desea. Y pesey un dia manera awe mester ta pa nos tur momentonan pa nos recorda e hechonan grandi di dje, naturaleza tin su propio rumbo. E inspiracion di Betico a pasa tambe pa su propio juman. Awe nan ta demostrando diariamente di a lanta bao di e dirigencia di un lider cu a pone su propio bida, su propio interesnan material un banda, pa e carga e bandera di su pais, su nacion, su Pueblo. Un dirigente cu a sirbi e anhelo di su Pais y su Pueblo y a laga un herencia grandi. E herencia cu mi tin e honor di traha cune tur dia, ta su juman. El a cende e candela den un Pueblo, e candela di amor pa nos tur sinti local e bator di un pais ta, y ora cu nos mira e dificultadnan diario cu nos mester surmonta, nos ta mira su inspiracion diariamente den tur parti di oficianan di Gobierno.

Betico a trece union unda tabata tin division. El a duna direccion caminda esey a bay perdi. El a inspira caminda tabata reina fatalismo. El a trece optimismo y speranza den un mihor futuro, caminda tabata reina negativismo y pesimismo. El a para e destruccion di nos mes y duna nos un sentido di orguyo nobo.

E ehempel di Betico, mester ta guia y inspiracion pa nos awe y pa generacionnan den futuro. Ariba un dia manera awe, nos no por sera nos wowo pa Su bida, e bida di Betico y pensa cu esaki

ta historia. Naturalmente e ta historia, pero e ta historia di nos Pueblo. E ta historia di un di e juman di mas grandi, cu nos tera a produci. Su bida, rico na experiencia mester ta un buki di sabiduria pa nos.

E inspiracion di lidernan di nos Pueblo manera Betico, semper lo sirbi como un forza grandi pa nos generacion awe na bida. Pero mas ainda mi ta kere cu e tempo a yega pa nos pone mas enfasis tambe, pa e rikesa cu Betico a laga pa nos, worde trasapa pa generacionnan despues di nos. Y ta pa e motibo aki mi ta kere cu lo ta bon pa nos cuminsa bin cu iniciativanan pa nos duna e dia nacional aki mas contenido den futuro.

Conciudadananan, nos a sobrepasa cu exito retonan di estructura estatal di nos pais den pasado hunto cu liderazgo di Betico. Nos a establece un pais nobo; mescos a saca nos pais for di crisis; nos a pone un pais fuerte riba pia. Mescos cu nos a logra esey nos mester tin e confianza cu lo por atende bao di Su inspiracion e retonan pa futuro. Union na cas, confianza den nos mes y inspira pa lidernan manera Betico, a prueba di ta un forza pa nos. Esaki nos mester percura pa pasa pa e generacionnan nobo. E balornan grandi cu nos a hereda, mester bira e herencia di nan.

Cu e optimismo y determinacion cu nos a conoce di un lider manera Betico, semper keda nos inspiracion pa e worde uza na bienestar di futuro di nos pais.